

玉函山房輯佚書

目耕帖卷二十九

歷城馬國翰竹吾甫

禮七

校人掌王馬之政注政謂差擇養乘之數也月令班
馬政陳深訓雋收養之法有養之於官有藏之於
民所謂藏之於民如邱甸歲取馬四匹之類不仰
國家芻秣如有事田獵征伐臨時徵召然而在天
子之都諸侯之國大夫之家未嘗不自畜馬此是
養之於官者漢家所謂二十六苑亦是官司所養

之馬如衛青霍去病之徒伐匈奴有所謂官馬有
所謂私馬則其制尙存隋唐之間治兵之制天子
閑廐監牧非不盛然府兵未嘗給馬初不過給之
以錢使府兵自買若是不足衆人共出錢買馬以
此知尙有古人遺法後來岳法漸壞府兵貧不能
買馬然後以監牧之馬給之乃是制度之壞如此
凡頒良馬而養乘之乘馬一師四圉三乘爲阜阜一
趣馬三阜爲繫繫一馭夫六繫爲廐廐一僕夫六
廐成校校有左右騶馬三良馬之數羣馬一圉八

圉爲師八師一趣馬八趣馬一馭夫注校有左右
則良馬一種者四百三十二匹五種合二千一百
六十匹駕馬三之則爲千二百九十六匹五良一
駕凡三千四百五十六匹然後王馬大備麗耦也
駕馬自圉至馭夫凡馬千二十四匹與三良馬之
數不相應八皆宜爲六之誤也師十二匹趣馬七
十二匹則馭夫四百三十二匹然後從而三之爲
千二百九十六既三之無僕夫者不駕五路卑之
也賈疏依經八計之得千二十四匹其三良馬則

當千二百九十六匹故言不相當若作六計得千二百九十六匹與三良馬數合又云不見駑之馭夫或脫也王應龍翼傳舊說謂駑馬二千二百九十六匹是駑馬爲良馬三之一非三良馬之數矣八麗十六匹一圉師教之八師一百二十八匹也一趣馬駕之八趣馬一千二十四匹也一馭夫領之止於馭夫而不屬於僕夫者以駑馬止充雜用而不當王之五路也凡七馭夫爲馬七千一百六十八匹則與三良馬之數略相當矣王安石新義

爲一物而必三良馬之數者以馬材之不良者充役事爲多故也

天子之馬十有二閑馬六種邦國六閑馬四種家四閑馬二種賈疏引趙商問以司馬灋論之甸方八里有戎馬四匹長轂一乘合大夫采地四甸一甸共王其餘三甸纔有馬十二匹就校人之職相較甚異答曰司馬灋甸有戎馬四匹長轂一乘此爲民出軍賦無與於天子國馬之數林之奇全解周禮以天子十有二閑先儒論數不過三千餘匹衛

文公承夷狄殘滅新造之國末年亦至駟牝三千
若以制度論之衛以諸侯之國又當殘亂之餘安
得遽如成周全盛乘馬之數蓋所謂天子十有二
閑是養之於官者衛文公之駟牝三千舉官民通
數而言之此成周官民通牧之制也

凡馬特居四之一注欲其乘之性相似也物同氣則
心一鄒司農云四之一者三牝一牡賈疏三牝各
一通牡爲四共駕一車取同氣一心之義王安石
新義三牝一牡飲其生之衆也恭讀

欽定周官義疏陳氏注謂牝牡雜則不可以駕此謂養馬
時不知馬共槽棧亦蹄齧不可養惟注三牝一牡
欲其乘之一性相似爲近然果爾則經文當曰凡
馬乘匹牡居之一其義乃著以近代之法證之凡
牡駒之屬九而存一以爲特以非屬雖人騎亦難
控制也况欲服之騁之而齊其任乎先王愛物之
政則屬三而存一對屬而言故不曰牡而曰特也
所存之特既少則通淫時以一特將三牝義亦可
該矣

春祭馬祖執駒注馬祖天駟也孝經說曰房爲龍馬
王應龍翼傳天文閣道下王良前四星名曰天駟
馬稟其氣以生春氣發故祭之以祈蕃息舊說以
房爲天駟主天子之後寢於五月初昏正當午位
而乾爲馬得午位盛陽之氣適當房之次故傳會
而爲此說恭讀

欽定周官義疏房固主後宮而一星不必止主一事伶州
鳩曰武王克殷月在天駟日在析木之津辰在斗
柄此天駟指房宿未可以爲非也

總文心雕龍其說爲長曰古名車以兩馬以匹蓋
車有佐乘馬有驂服皆以對並爲稱雙名既定則
雖單亦復爲匹如匹夫匹婦之稱匹是也說文解
字麗旅行也鹿之性見食急則必旅行此古人制
字之本義也

職方氏辨其邦國都鄙四夷八蠻七閩九貉五戎六
狄之人民注鄭司農云東方曰夷南方曰蠻西方
曰戎北方曰貉狄元謂閩蠻之別也國語閩芊蠻
奚四八七九五六周之所服國數也賈疏案鄭語

史伯曰蠻芊蠻奚不作閩後人傳寫誤也鄭氏以閩爲正又引趙商問明堂位九夷八蠻六戎五狄數與此異鄭答職方氏四夷四方夷狄也九貉卽九夷在東方戎狄之數或六或五爾雅有其數文不甚明故不定爾雅釋地九夷八狄七戎六蠻謂之四海邢昺疏案明堂位稱九夷八蠻六戎五狄周禮職方氏掌四夷八蠻七閩九貉五戎六狄之人鄭注云四八九五六周之所服國數也編檢經傳四夷之數參差不同先儒舊解此爾雅上文殷

於三乘知之爲詳故韋贊校人而正其等不使之
間雜不齊也六節謂行止進退馳驟之節舊說以
爲種戎道齊田駕此乃六物豈得爲六節且此專
皆贊正良馬安得以駕馬雜之此駁正賈疏極當
說六節亦頗近理劉彝中義目以知其膽之不驚
口以知其性之不悖耳以知其力之不殫鬣以知
其血之有餘毛以知其氣之不暴蹄以知其行之
不跲六者簡馬之大節也劉說不知何據似從古
相馬法中括而言之

巫馬掌養疾馬而乘治之相醫而藥攻馬疾受財於
校人賈疏巫知馬崇醫知馬疾疾則以藥治之崇
則辨而所之二者相須故巫助醫也案天官有獸
醫夏官復設巫馬四人醫四人重馬政也

國之大事在祀與戎牛爲牲故地官有牧人主養牛
馬共乘故夏官有牧師主養馬國憲家猷秣馬之
法必視其齒歷勞逸而調息之養馬之要盡於此
數語

庾人掌十有二閑之政教以阜馬佚特教駢攻駒注

杜于春云佚當爲逸案佚逸古今字孟子四支之
於安佚也正作佚字無煩改也

及祭馬祖祭閑之先牧及執駒散馬耳圉馬鄭司農
云散謂聒馬耳毋令善驚也後鄭云閑之先牧先
牧制閑者散馬耳以竹括押其耳頭斬搖則括中
物後遂串習不復驚鄭鑄解義庾人職卑不宜主
馬祖之祭蓋於校人祭馬祖之時則祭閑之先牧
於校人命執駒之時則散馬耳圉馬曰及者及此
時則舉此事爾又云散者以其疎散而不知畏故

恥其耳聞猶禁園之園蓋禁而制之使不得以近
母

正校人員選注校人謂師園也正員選者選擇可備
員者平之却敬完解校人總馬政擇馬全善者備
五路之用也鄭謂校人爲師園恐非王應電翼傳
馭夫以下備員於校人而中其選者庾人差而正
之案二說皆與注異困學紀聞汧渭之間未嘗無
牧而非子獨能蕃息於周汧隴之間未嘗無牧而
張萬歲獨能蕃息於唐此得人之效也語極精渾

馬八尺以上爲龍七尺以上爲駉六尺以上爲馬注
小大異名爾雅駉牡驪牡元駒褒駉鄭司農云月
令駕蒼龍陸佃埤雅釋馬周官馬八尺以上爲龍
戎馬之高蓋亦準此故爾雅曰馬八尺爲駉也駉
卽戎馬故其字指事而戎事齊力尙強故爾雅又
曰絕有力駉也校人云種馬一物戎馬
卽駉馬是也種馬卽龍是也史言良馬謂之龍種
蓋出於此又云詩曰駉牡三千三千已多駉牡取
其大也蓋驃馬常小今俗謂之小馬以此宗廟用

龍戎事用駮田事用騾駮田馬也考工記曰國馬
之輅深四尺有七寸田馬之輅深四尺鄭云國馬
高八尺衡高八尺有七寸除馬之高則餘七寸爲
衡頸之間也田馬高七尺衡高七尺有七寸除馬
之高爲衡頸之間也

圉師掌教圉人養馬春除蓐豐廐始牧夏庠馬冬獻
馬注蓐馬茲也馬旣出而除之新豐焉神之也春
秋傳曰凡馬日中而出日中而入故書庠爲訝鄭
司農云當爲庠元謂庠廐也廐所以庇馬涼也劉

舜中義冬寒以草藉馬曰蓐春則除之去其穢也
蠶廢去邪氣也案劉氏訓義明晰序作訝古文假
借字先鄭定作序序卽今之馬棚也

射則充樁質茨牆則翦闔注茨蓋也闔苫也鄭鍔解
義闔與左傳戎子駒支所苫蓋之蓋同茨牆之時
必使園師翦闔以其莖斬馬草熟於其事也翰案
闔讀爲蓋古無此音說文解字闔閉也春秋左傳
襄十五年吾儕小人皆有闔廬以辟燥溼杜預注
闔謂門戶閉塞翦闔者謂翦除其茨之散亂闔閉

其牆之罅孔也

圉人良馬匹一人駕馬麗二人注麗耦也應劭風俗
通相馬及君子與人相匹或曰馬夜行日明照前
四丈故曰一匹或曰度馬縱橫適得一匹或說馬
死賣得一匹帛或云春秋左氏說諸侯相贈乘馬
束帛帛爲匹與馬之相匹耳程大昌演繁露馬以
匹爲數自古言匹馬皆一馬也文侯之命有馬四
匹不知當時何指韓詩外傳謂馬夜行目光所及
與匹練等或曰匹言價與匹帛等不知孰是讀劉

夏祭先牧頒馬攻特注夏通淫之後攻其特爲其蹄
齧不可乘用鄭司農云攻特謂蹠之王安石新義
攻特謂駒之不可習者庾人攻之矣及成焉而不
可習則校人攻之邾敬完解攻特牝馬方孕攻去
其特勿使近牝案夏小正執陟攻車傳攻車也者
教之服車數舍之也此介甫之所本月令仲夏之
月游牝別羣注孕妊之欲止也此仲輿之所本然
皆與執駒文複經以攻加特則先鄭之說不可易
矣

等馭夫之祿宮中之稍食注宮中師圉府史以下也
王氏新義宮中之稍食則馬有養乘於內者故也
恭讀

一
疏定周官義疏宮當作官字之誤也他職有府史此更有
師圉之屬以官中該之與秋官士師掌官中之政
令同義據注義亦當作官蓋漢時所誤

趣馬掌贊正良馬而齊其飲食簡其六節注差擇王
馬以爲六等賈疏六等卽上種戎齊道田騶六種
是也王應電翼傳良馬以駕五路也趣馬所掌止

明堂位及職方并爾雅下文皆爲周制義或當然也

職方氏九州注此州界揚荆豫兗雍冀與禹貢略同
青州則徐州地幽并則青冀之北也無徐梁賈疏
周之兗州於禹貢侵青徐之地周之青州於禹貢
侵豫州之地周之雍豫於禹貢兼梁州之地周之
冀州小於禹貢時以北有幽并故也周之九州無
徐梁禹貢有徐梁無幽并蓋自古皆有九州惟舜
時置十二州至夏還爲九而周之疆域又異也薛

季宣尙書古文訓冀充青徐揚荆豫梁雍禹貢之九州也冀豫雍幽營揚充荆徐爾雅之九州也揚荆豫青雍冀幽并職方之九州也郭璞以爾雅所稱爲殷制是殷有幽營而無禹貢之梁青周有幽并而無禹貢之徐梁邢昺爾雅疏禹別九州有青徐梁而無幽并是夏制也周禮周公所作有青并幽而無徐梁營是周制也此有徐幽營而無青梁并是殷制也王安石新義九州之序禹貢始於冀次以充而終於雍職方則始於揚次以荆而終

於井者蓋禹貢言治水之序職方言遠近之序治水自帝都始然後順水性所便自下而上故自兗至雍而止以遠近言之則周之德化自西北而南以南爲遠以遠爲難至故也始於揚州則以揚在東南次以荆以荆在正南終於井則以井在正北先遠而後近也王應龍翼傳舜時四夷來王封域極廣牽十有二州後有作者不可及矣周時大約與舜同但淮與大野在禹貢爲徐州之川澤而職方青州之川淮泗兗州之澤大野是以徐而入青

兗矣華陽璆鐵砮磬在禹貢爲梁州之山與貢也而職方豫州之山華雍州之利玉石是以梁而入雍豫矣此爲不同耳然無徐州者蓋洪水之害唯河爲大禹其下流施功爲多故建徐州周時碣石淪於海正東之地不及於虞故有青兗則雖華徐州而東方無空若無梁州則西南與地似於缺然何也夫天地之化開之有漸始西南而次東北次東南次正南故上古聖人皆出於北方周家世居西土文王之化近及江漢正荊州之地武王伐紂

而庸蜀羌蠻景從是乃梁州以及於徼外之地然
其中未歸化者則甚衆故周公以其施貢所及者
則分屬於荆雍豫而其不及以政者亦不入於職
方也翰案此說甚確可與五戎六狄參通

正南曰荊州其浸潁湛注潁出陽城宜屬豫州在此
非也湛未聞又引杜子春云湛讀當爲人名湛之
湛湛或爲淮賈疏潁據地理志合在豫州又昭元
年左傳又使劉定公勞趙孟于潁亦在豫州易祓
總義襄十六年左傳楚公子格帥師及晉師戰于

湛阪杜注襄城昆陽縣北有湛水東入汝案地志
卽今汝州之襄城縣昆陽故城在今汝州之葉縣
經以爲荊州之浸必有脫誤處黃度說鄭氏言潁
宜屬豫州據禹貢也然周人畫地或有所更華湛
水酈道元水經注出華縣北魚齒山西北東南流
歷魚齒山下爲湛浦注云未聞疎也案今汝州魯
山縣卽漢之華縣魚齒山在龍興縣連接梁縣是
則周荊州界自隨巴唐鄧東北至汝潁與豫州分
界而荆牧治宛宣王封申伯

河南曰豫州其川滎維其浸波澁注滎兗水也出東垣入於河決爲滎滎在滎陽波讀爲播禹貢曰滎播既潏春秋傳曰楚子除道梁澁軍臨隨則澁宜屬荊州在此非也易敝總義澁水左傳莊四年楚令尹關郇莫敖屈重除道梁澁營軍臨隨杜氏以爲澁水在義陽厥縣西東南入鄖水義陽卽今信陽軍之西去隨甚近唐志澁水出隨州隨縣西四十里此正古豫州之地康成以爲宜屬荊州蓋漢人誤以南陽郡爲荊州不知古荊州在荆山之南

康成狗漢志而誤也黃度說水經注魯陽縣霍陽
西大嶺東谷俗謂之歇馬嶺卽應邵所謂孤山波
水所出也水南流入滢杜佐通典此爲豫州浸之
波魯陽今魯山縣霍陽山在今梁縣俗稱峴山又
水經注滢水出隨州隨縣黃山南南流入鄧今梁
職方諸浸多相接而豫浸波滢原委頗異又相去
遠而馬融廣成澤頌亦曰浸以波滢波近廣成澤
滢則遠矣不知何以自古聯稱恭讀

欽定周禮義疏滢滢二字疑傳寫互譌豫州當曰滢波荆

州當曰湛澹鄭注似不可破

河東曰兗州其浸廬維注云廬維當爲雷雍字之誤也釋文廬石經作廬王應麟困學紀聞引顏師古曰廬水在濟北廬縣說文濰水出琅琊箕屋山東入海徐州浸夏書濰淄其道鄭讀非也黃虔說濰水出密州莒縣濰山北至濰州昌邑縣入海廬水經注出密州諸城縣廬山卽久台水也西北入濰二說皆如字讀

正北曰并州其川岸池嘑夷其浸涑易注序池出鹵

城嘔夷祁夷出平舒涑出廣昌易出故安易祓總
義嘔夷鄭注疑卽祁夷出平舒攷漢志代郡平舒
縣有祁夷水北至桑乾入沽唐蔚州興唐縣本代
郡地嘔夷一名涑水出縣西北之高氏山東北流
至興唐縣又東流至瀛州之博野東入於河黃度
說易水有三皆出易州易縣寰宇記北易一名安
國河出縣西北窮獨山水經注所謂濡水也中易
出閭鄉城寬中谷東南流至古易京城與北易合
流入巨馬河水經注易水與濡水互攝通稱南易

山縣東南卽山燕王仙臺東石虎是東流與雹河
合又東至霸州容城縣南流入高陽縣合澧水又
水經云易水至文安縣與岸池合班固關駟皆以
此爲南易案此二說皆足輔翼鄭注

鄭樵六經輿論禹貢有五服各服五百里是禹之時
地方五千里職方有九服亦各五百里並王畿千
里則周之時地方萬里矣五服九服之制雖若不
同詳攷制度無不相合若禹貢之五服各五百里
自其一面而數之職方九服各五百里自其兩面

而數之也周之王畿卽禹貢之甸服各方千里禹貢之甸服五百里據一面而數之周畿千里不在九服之內王畿之外定爲九服各五百里以兩面相方而數之大抵周之王畿卽禹之甸服周之侯甸卽禹之侯服周之男采卽禹之綏服周之衛蠻卽禹之要服周之夷鎮卽禹之荒服大率二畿當一服而周人鎮服之外又有五百里之藩服去王城二千五百里乃九州之外地增於禹貢五百里而已故行人之職其言九州之外謂之藩服則九

州之外又有五百里之藩服明矣且禹貢五服而止周人必加以藩服五百里何也求之禹貢亦莫不然禹貢旣敘五服又曰東漸于海西被于流沙朔南暨聲敎訖于四海是九州之外地也又如益稷曰弼成五服至于五千州有十二師外薄四海咸建五長謂四海之外如建諸侯爲之長豈非周之藩服乎說義名通可取

王殷國亦如之注殷猶衆也十二歲王若不巡守則六服盡朝謂之殷國其戒四方諸侯與巡守同賈

疏王巡守殷國殷國則殷同也王巡守則當方諸
侯所在經過悉至方嶽之下若殷國或在王城或
出畿外所在皆設禮待王故巡守殷國並言黃度
說大宗伯殷見曰同大行人殷同以施天下之政
此經曰殷國正謂時巡守朝諸侯於方岳考制度
大明黜陟也言殷國則巡守可知注謂十二年王
若不巡守則六服盡朝謂之殷國非也姜兆錫輯
義國當作同文誤也按巡守殷國大行人掌客連
文當爲一禮據職方文當爲二禮

舒芬周禮定本吳氏以訓方氏并下匡人擇人皆移
隸司徒謂其職文皆訓迪教化之意也芬謂司徒
之教主在萬民雖國子亦隸之大司樂矣蓋周之
六卿實以三公兼任教王而論道司徒不得專也
况周公設官雖內小臣奄人亦必擇上士爲之豈
以輔成王德而專責之司徒一官哉惟此義不明
後世遂以輔導啓沃專委館閣侍從之臣六卿雖
兼師保輒自委以有所司守於君德昏明惛然無
所動於中也吳氏考官但取其職文之類而不知

周公設官立極之精意乃如是哉

形方氏掌制邦國之地域而正其封疆無有華離之
地注杜子春云離當爲雜元謂華讀爲𠂔𠂔之𠂔
正之使不𠂔邪離絕賈疏地有𠂔邪離絕遞相侵
入則不正故令正之𠂔者兩頭寬中狹邪者謂一
頭寬一頭狹云𠂔𠂔之𠂔者投壺禮主人云枉矢
𠂔壺是不正之義故讀從之王安石新義華與記
爲國君削瓜𠂔華之同義析而不絕爲華絕而不
屬爲離翰案萃與華二字唐韻萃火媧切集韻萃

火龍切並音晒舛雅之貌集韻又音昔乖切音曷
不正也介甫直作華字非是

山師掌山林之名辨其物與其利害而頒之於邦國
使致其珍異之物葉時禮經會元名山大澤不以
封其餘山林川澤仍頒之於邦國使致其珍異之
物夫不封以山澤之大者用弭諸侯之侈心而謹
天子之守地必頒以山澤之利者爰示諸侯之公
心而均天下之利源

遼師掌四方之地名辨其邱陵墳衍遷隰之名物之

可以封邑者注物之謂其土地可以居民立邑鄭
錡解義辨其邱陵墳衍遠隰之名物之所以封邑
者當爲一句王安石新義辨其名以知平陂燥溼
辨其物以知肥磽嫩惡按王氏訓義亦以物之屬
上讀

王與之訂義古者國之子弟無時不加教無處不有
學退在學校受教於大司樂大胥諸子進在王所
受教於師氏保氏入而宿衛宮伯按其在版者而
教之出而守禦都司馬掌其政學以教之非若後

世之教止於庠序而已

大司寇之職掌建邦之三典以佐王刑邦國詰四方
一曰刑新國用輕典二曰刑平國用中典三曰刑
亂國用重典林之奇全解輕典柔克也中典正直
也重典剛克也故書曰惟敬五刑以成三德何喬
新集注三典以用刑猶三德以爲治然人君撫世
酬物又不可執一焉新國固宜輕典然縱弛之後
人有慢心可以水濟水平必時出猛政攝服人心
如諸葛亮之治蜀可也亂國固宜重典然殘虐之

餘人無生意可以火益熱乎除其煩苛使人知有
人生之樂如裴度之入蔡可也平國固宜用中典
然濃度不修姑息爲治則國勢寢微矣必修明制
度振舉紀綱使臣民有所警愆子孫有所持循可
也總之因時制宜不失先王立憲之意可矣

五曰國刑上愿糾暴注暴當爲恭字之誤也王安石
新義失愿而暴刑之所取也何喬新集注國國中
以謹愿爲上而察其强暴者則刑之暴者愿之反
也二家皆讀暴如字與鄭異

以兩造禁民訟入束矢於朝然後聽之以兩劑禁民
獄入鈞金三日乃致於朝然後聽之注必入矢者
取其直也古者一弓百尺束矢其百箇與又云必
入金者取其堅也三十斤曰鈞賈疏此并下二經
論禁民獄訟不使虛誣之事是禁民省事之灋也
邱富國說束矢鈞金非貧民可辦然理直者固當
還之雖貧民未遽困也况其不能致者又有肺石
路鼓以達之乎王應龍翼傳兩人皆至則詞不獲
逞兩劑並陳則詐不可逃而各入束矢鈞金則心

有所惜故雖健訟者多相與和解而止此所以爲
禁民訟禁民獄之法也

以肺石達窮民注肺石赤石也劉彝中義肺者氣之
府而外達乎皮毛悍獨老幼天民之窮而無告者
其微弱也猶國之皮毛焉心之氣靡不通之也不
通則疾病生焉故用之窮民其有取於是乎龐元
英文昌雜錄長安故宮闕前有唐肺石尙在其制
如佛寺所繫響石而長大長八九尺形如人肺亦
有款志但漫滅則不可讀秋官大司寇以肺石達

窮民原其義乃伸冤者擊之立其下就士師聽辭
如今之搥登聞鼓也所以爲肺形者便於垂又肺
主聲之所以達其冤也案龐氏說肺石形製必有
所傳受謂如今之搥登聞鼓非是大僕建路鼓於
大寢門外以達窮者與遠令登聞鼓是其遺法彼
有大冤抑欲急聞此則小獄訟故士師聽辭立三
日乃聽之與彼異用劉氏說近之

凡邦之大事使其屬蹕故書蹕作避杜子春云當爲
辟謂辟除姦人也元謂蹕止行也釋文蹕本又作

趕翰案天官宮正凡邦之事蹕夏官隸僕掌蹕宮中之事小司寇使其屬蹕經皆作蹕而此經故書作避釋文云本又作趕是亦因避字而異文作趕耳當依故書作蹕如杜子春訓義蓋大司寇所掌是避除小司寇所掌是警蹕事本不同王安石新義小司寇國之大事使其屬蹕則事在國中而已大司寇邦之大事使其屬蹕則事之所在通國野焉分別亦有理但未若據古文訂正尤爲的據也小司寇之職掌外朝之政注外朝朝在雉門之外者

也王與之訂義後鄭解外朝謂雉門外非也外朝之士所掌在庫門之外王志長嗣翼引或云王有內朝有治朝有外朝外朝在庫門之外說同訂義案朝士鄭注掌外朝之灋不知此注何以忽異雉門疑庫門筆誤也

以五刑聽萬民之獄訟附于刑又以八辟麗邦灋附刑罰注並云故書附作付前注云附猶著也王志長刪翼附者著於物而帖然之謂刑之輕重與其罪鑑鉢相准故曰附也說附字甚諦切

小司寇以三刺斷庶民獄訟之中注刺殺也三訊罪
定則殺之賈疏所刺不必是殺餘四刑亦是三刺
直言殺者舉瀆重者而言鄭經解義此三刺亦有
刺取之義司刺掌三刺三宥三赦三瀆注亦云刺
殺也易赦總義刺者刺取人情之當否而後加刑
殺也與鄭剛中義同

孟冬祀司民獻民數于王王拜受之以圖國用而進
退之王應電翼傳謂上經及大比登民數一節當
移屬於此歲終則令羣士計獄弊訟登中于天府

翼傳謂下經命其屬入會乃致事當屬於此

命羣士乃宣布于四方憲刑禁金瑤述注乃字疑衍
文乃命其屬入會乃致事述注大宰歲終受會各
官焉得正歲入會此節恐有錯文王應電翼傳小
司徒致治後卽令羣吏正要會而致事此應繫登
中于天府下案凡經中言乃者多是鄭重之詞此
經以職事贊于天官大宰故重其事故言乃宣布
乃致事非衍文亦非錯文也王明卿於小司寇職
改正節次者非一可備一解未知是否

目耕帖

卷十九

三十四如婦能利老

士師掌士之八成注鄭司農云八成者行事有八篇
若今時決事比一日那注鄭司農云那讀如酌
酒尊中之酌那酌斟酌盜取國家密事若今時刺
探尙書事翰案漢人多引經斷獄隋書經籍志有
春秋決事十卷董仲舒撰先鄭所引此類是也春
秋穀深傳僖八年鄭伯來乞盟蓋酌之也爾雅釋
水井一有水一無水爲澗酌郭氏元中記貴州有
澗酌一日百盈百竭應澗刻集韻酌挹取也當如
乾沒之義

若邦凶荒則以荒辯之瀦治之注鄭司農云辯讀如
風別之別救荒之政十有二而士師別受其數條
是爲荒別之瀦元謂辯當爲貶聲之誤也遭飢荒
則刑罰國事有所貶損作權時瀦也劉氏迎曰荒
辯之瀦謂辯其輕重而爲之備也使凶荒而無辯
安知食二鬴與不能人二鬴者哉讀如字較鄭義
爲安

鄉士獄訟成士師受中協日刑殺肆之三日若欲免
之則王會其期注王欲赦之則用此親往議之李

觀周官論殺人者死而民猶有相殺傷人者刑而民猶有相傷苟以不忽而赦之則殺人者不死傷人者不刑殺傷人者無以懲其惡被殺傷者無以申其冤此不近於帥賊而攻人者乎是故先王雖有不忍人之心而不敢輒赦必於外朝與掌事者議其可否焉赦者非王赦之情可赦也否者非王不赦情不可赦也

協日刑殺釋文協作汁案汁古文叶字與協通用樂緯汁圖徵叶亦作汁

鄉士司寇聽之斷其獄弊其訟于朝羣士司刑皆在
各麗其瀛以議獄訟王昭禹詳說王制大司寇以
獄成告王王命三公參聽之此經不及三公者散
見於朝士之職也其職云面三槐三公位焉則三
公在其中矣案遂士職若欲免之則王令三公會
其職縣士職若欲免之則王令六卿會其期此合
三公六卿會議者蓋指疑獄也王制所言亦此類
此不言三公者常獄自司寇爲主率其屬而議之
爾

方士凡都家之士所上治則主之注所上治者謂獄之小事不附罪者也主之者告於司寇聽平之王志長剛翼主之者方士據其所上治而廉察都家士之能否也上治猶上計不專指小事言

訝士邦有賓客則與行人送逆之易被總義掌訝職與士逆賓客於疆士卽訝士也鄭鍔解義行人掌其禮訝士掌其刑金瑤述注訝士雖與掌訝同送迎而所重惟辟蹕及誅戮暴家耳

朝士掌建邦外朝之灋左九棘孤卿大夫位焉羣士

在其後有九棘公侯伯子男位焉羣吏在其後而
三槐三公位焉州長衆庶在其後注樹棘以爲位
者取其赤心而外棘象以赤心三刺也槐之言懷
也懷來人於此欲與之謀案注說本春秋元命苞
而微異初學記引緯文云樹槐棘聽訟於其下者
棘心有刺言治人者原其心不失赤實棘所以刺
人其情各歸實槐之爲言歸也情見歸實也

葉夢得石林燕語周有三朝一曰燕朝在路門之內
王圖宗人嘉事之朝也大僕小臣掌焉二曰治朝

在路門之外王日聽治之朝也宰夫司士掌焉一
曰外朝在庫門之外詢萬民聽政之朝也小司寇
朝士掌焉外朝之位朝士所掌朝法卿大夫以大
詢之時帥六卿之衆庶而致於朝百姓衆庶得與
公卿侯伯羣士羣吏相先後於階陛之間其政誠
爲平易近民矣治朝之位司士所正之朝儀而宰
夫掌其法大僕掌建路鼓於大寢門外以待窮達
與遽令宰夫掌庶民之逆得與賓客之治諸臣之
復同徹於天子之前則又未嘗以禁嚴爲限矣燕

朝之法雖在大僕然諸侯復逆掌於大僕三公孤卿復逆掌於小臣羣吏庶民之復逆又掌於御僕是庶民之復逆得與諸侯公卿羣吏達於燕寢之時則亦未嘗以邃深爲隔矣觀三朝之法則知成周盛時戶庭無壅其政通達何如哉

朝士凡有責者有判書以治則聽注故書判爲辨案判辨古今異文也判書先鄭謂別券也鄭鍔解義小宰所謂聽稱責以傳別是也

凡民同貨財者令以國瀆行之犯令者刑罰之先鄭

云同貨財者謂合錢共買者也以國瀆行之司市爲節以遺之後鄭云同貨財者富人蓄積者多時收斂之乏時以國服之瀆出之雖有騰躍其贏不得過此過此則罰之若今時加責取息坐藏又凡屬責者以其地傳而聽其辭先鄭云謂訟地畔界者田地町畔相比屬故謂之屬責以地傳而聽其辭以其比疇證也後鄭云屬責轉責使人歸之而本主死亡歸受之數相抵冒者也以其地之人相比近能爲證者來乃受其辭爲治之案此於義爲

疑恭讀

欽定周官義疏同貨財卽士師職所謂凶荒令民通財也
天災流行令民同貨財以相濟而以國法行之爲
責其償與息則富者樂於出財而民常不困矣犯
令謂多取息與能償而過期不償者上師令之朝
士又令之犯者加刑罰焉所以使出者無顧惜而
貸者不敢負也屬責此謂身亡而親屬執傳別以
責者蓋或妻子冥弱或族屬疏遠欺其不知故抵
冒也若轉責使人歸之則必契約佐證而無從抵

冒矣地傳謂傳別有土人佐證者小司徒聽民訟
所該者廣獨以其地附近之人正之不必有傳別
故曰地比

凡盜賊軍鄉邑及家人殺之無辜先鄭云謂盜賊羣
輩若軍共攻盜鄉邑及家人者王安石新義盜賊
軍謂盜賊衆而成軍王應電翼傳盜賊賊犯旣明
在軍若伍兩之長在鄉邑若比閭之長在家若至
親知而殺之又如昏夜爲盜而所在殺之皆不科
其罪使盜無所容也

吳澄三禮考注以司民屬司空舒芬周禮定本正之
謂鄉士遂士縣士皆有掌民數之文則司民之屬
司寇未見其有決不然者況秋成物之時也秋官
獻民數豈無謂哉今按其文有曰及三年大比以
萬民之數詔司寇司寇及孟冬祀司民之日獻民
數於王王拜受之登於天府內史司會冢宰貳之
彼司寇者見明王之重民數如此於決獄也寧不
戚焉動其不忍之心哉後世唯不知重民而司刑
者又多凶人暴吏羅織株連就戮者率數十百人

噫傷天心剝國命亦獨何歟由是言之則司民爲
刑官之屬固周公之深意而非漢儒之見所及也
司刑墨罪五百劓罪五百宮罪五百剕罪五百殺罪
五百注宮者丈夫則割其勢女子閉於宮中若今
宦男女也剕斷足也周改贖作刑又引鄭司農云
漢文帝十三年除肉刑王應麟困學紀聞崔浩漢
律序文帝除肉刑而宮不易書正義隋開皇之初
始除宮刑按通鑑西魏大統十三年三月除宮刑
非自隋始也碣石剩談婦人杯斲杯字出呂刑與

舜典宮刑相同男子去勢婦人幽閉是也昔遇刑部員外郎許公因言宮刑許曰五刑除大辟外其四皆侵損其身而身猶得自便親屬相聚况婦人課罪每輕宥於男子若以幽閉禁其終身則反苦毒於男子矣桮窵之法用木槌擊婦人胸腹卽有一物墜而掩閉其牝戶止能溺便而人道永廢矣是幽閉之說也

子語類漢文帝除肉刑後世之五刑降死刑一等則流徒杖笞而已生刑死刑輕重相懸不能使民

無犯善乎胡仁仲之言曰生刑輕則易犯是教民以無恥也死刑重賊難悔是絕民以自新之路也生刑死刑輕重不相懸庶幾民知所避而風化興矣又云今徒流之法旣不定以止穿窬淫放之多而其過於重者則又有不當死而死以強暴賊滿之類者苟采陳羣之議一以宮荆之辟當之則雖殘其支體而實全其軀命且絕其爲亂之本而使後無以肆焉豈不仰合先王之意而下適當世之宜哉陳羣復肉刑議載魏志本傳今錄於此時太

祖議復肉刑令曰安得通理君子達於古今者使
平斯事乎昔陳鴻臚以爲死刑有可加於仁恩者
正謂此也御史中丞能申其父之論乎羣對曰臣
父紀以爲漢除肉刑而增加笞本興亡惻而死者
更衆所謂名輕而實重者也名輕則易犯實重則
傷民書曰惟敬五刑以成三德易著剝則滅趾之
法所以輔政助教懲惡息殺也且殺人償死合於
古制至於傷人或殘毀其體而裁翦毛髮非其理
也若用古刑使淫者下蠶室盜者刖其足則永無

淫放穿窬之姦矣夫三千之屬雖未可悉復若斯數者時之所患宜先施用漢律所殺殊死之罪仁所不及也其餘速死者可以刑殺如此則所刑之與所生足以相質矣今以笞死之法易不殺之刑是重人支體而輕人軀命也時鍾繇與羣所議同司刺壹赦曰幼弱再赦曰老旄三赦曰憊愚釋文旄本又作耄案孟子反其旄俛耄亦作旄古字通用文獻通考按唐虞三代之所謂赦者或以其情之可矜或以其事之可疑或以其在三赦三宥八議之

列然後赦之蓋臨時隨事而爲斟酌所謂議事以制者也至後世乃有大赦之法不問情之深淺罪之輕重凡有犯在赦前則殺人者不死傷人者不刑盜賊姦宄不詰於是赦遂爲偏枯之物長姦之門矣

司約治功之約次之注功約謂王功國功之屬賞爵所及也王與之訂義治功之約則若虢仲虢叔勲在王室藏於盟府之屬是也黃度說功約水土之功鄭下文注訟約引春秋將城成周宋仲幾不受

功卽此功也案黃說與注不同可備一解

凡大約劑誓于宗彝注大約劑邦國約也誓於宗廟之六彝欲神監焉恭讀

欽定周官義疏此經所謂宗彝與尙書異蓋宗廟之典冊也

司盟凡邦國有疑令同則掌其盟約之載及其禮儀北面詔明神旣盟則貳之注貳之者寫副當以授六官王昭禹詳解謂其正藏於天府案玉府無其文玉府有共珠槃玉敦之事當是誤玉府爲天府

也細繹此經下文凡民之有約劑者其貳在司盟
注貳之者檢其自相違約也賈疏此謂司約副寫
一本來入司盟邦國有疑會同言掌其盟約之載
亦是與司約共其事則正本當在司約也

版於上帝則共其金版饗諸侯亦如之注銍金謂之
版此版所施未聞王與之訂義掌次言王大旅則
張璠案設皇邸先儒以邸爲後版屏風也所謂金
版則以金飾與饗諸侯亦如之承賓如神也郝敬
完解以金爲葉大祭書祝辭大饗書策辭說雖異

而愜於理

司厲其奴男子入於皐隸女子入於舂槩先鄭曰謂
坐爲盜賊而爲奴者輸於罪隸舂槩舂人槩人之
官也由是觀之今之奴婢古之罪人也故書曰予
則奴戮汝論語曰箕子爲之奴罪隸之奴也後鄭
謂奴從坐而沒入縣官者男女同名周循宜管涔
子奴僕曰奚見周禮曰輿曰臺見左傳曰廝役扈
養見公羊傳曰盟奴曰蒼頭盧兒見漢書曰應門
兒李令伯表荆淮海岳并齊之間罵奴曰臧罵婢

曰獲齊之北鄙燕之北郊凡人男而墜婢曰臧女而婢奴曰獲亡奴謂之臧亡婢謂之獲皆爲奴婢之賤稱秦晉之間罵奴曰侮燕齊之間養馬者及奴婢女厮皆謂之娠見方言翰案臧獲侮娠諸名皆漢世罵奴婢之稱猶存古意

大人凡幾珥沈率用駝可也注故書駝作龍鄭司農云龍讀爲駝駝謂不純色也案牧人職毀事用駝作駝字考工記玉人上公用龍注謂雜色與此同作龍周易說卦傳震爲龍虞翻作駝則駝龍二字

古通用也顧野王玉篇駝馬黑白毛也黑白相雜如駝故凡不純色者皆謂之駝

司圖凡害人弗使冠飾而加明刑焉注弗使冠飾者著墨幪若古之象刑歟賈疏孝經緯云五帝畫象三王肉刑畫者上罪墨幪赭衣雜屨中罪赭衣雜屨下罪雜屨而已案墨子書畫衣冠異章服謂之戮上世用戮而民不犯亦指五帝畫象言

掌囚凡囚者上罪桎梏而桎中罪桎梏下罪桎注鄭司農云桎者兩手共一木也元謂在手曰桎在足

曰桎劉敞七經小傳桎春秋傳以弓桎華弱於朝
易曰童牛之牯王安新義桎其脰桎在足羣在手
左傳子蕩以弓桎華弱於朝則桎在脰明矣

掌戮掌斬殺賊謀而搏之注罪大者斬之小者殺之
搏當爲膊諸城上之膊字之誤也膊謂去衣磔之
案搏當如字司隸職云帥其民而搏盜賊卽此搏
字禮記月令孟秋之月慎罪邪務搏執搏持也斬
殺賊謀防其竄逸故嚴禁而搏持之若作膊釋爲
磔則下文辜之又是何刑

斬殺刑戮亦如之黃度說後鄭以戮爲膊焚辜肆非也戮猶辱也古刑戮字皆合輕重稱之

髡者使守積注元謂此出五刑之中而髡者必王之同族不宮者宮之爲剪其類髡頭而已守積積在隱者宜也王氏翼傳舊說以髡爲同族之犯宮刑而減之者非也蓋公族不剪其類但可減爲剛已下耳苟降從髡則應劭刑者不獲減刑乃反重耶案鄭據禮記公族無宮刑而爲此說但經亦不言宮刑當減何罪則明卿說降從劓刑爲當髡者當

是輕罪髡者守積漢書刑法志當黥者髡鉗爲城
旦春是周之遺法也

司隸掌帥四翟之隸使之各服其邦之服執其邦之
兵守王宮與野舍之屬禁易祓總義周之興也東
南先服王化四翟之隸卽南方之蠻東南之閩東
方之夷東北之貉其服屬有素故使列於守衛

罪隸其守王宮與其屬禁者如蠻隸之事王應電翼
傳十四字宜屬閩隸誤衍於此按司隸職止言掌
帥四翟之隸守王宮與野舍之屬禁未嘗及於罪

隸盡罪隸乃免死之人故不可使守禁密之地且
宮正宮伯所掌士庶子虎賁之士司隸四翟之隸
於王宮之守故自己足亦何假於罪隸又以文勢
推之豈有未言蠻隸而遽言如蠻隸之事乎閩隸
正脫此簡故愚以爲誤衍於此也

閩隸掌役畜養馬而阜蕃教擾之掌子則取隸焉注
杜子春云子當爲祀元謂掌子者王立世子置臣
使掌其家事而以閩隸役之王安石新義掌役畜
養鳥則役於掌畜而爲之養鳥也子謂鳥所生也

司隸言帥四翟之隸守王宮與野舍之厲禁則閩隸之有守固可知矣案王說跟上義似稍貫

序官貉隸百有二十人注征南夷所獲閩隸百有二十人注閩南蠻之別夷隸百有二十人注征東夷所獲貉隸百有二十人注征東北夷所獲王應電翼傳職方氏所掌有四夷八蠻七閩九貉五戎六狄之人民蓋皆臣服於中國而此上於蠻夷閩貉者閩人世居西土其化先及於西北故以服東南爲貴舊說以爲征夷所獲赦其死而役之非也許

攷四隸之職唯有養獸與守王宮二事則非俘獲可知果爲俘獲自當屬之罪隸若其生子孫乃可屬此耳王志長刪翼備引汲冢周書王會解以爲王會所陳似乎侈大其說然成周服遠於此可見蠻閩夷貉之隸蓋指此也

舒芬周禮定本自司隸至此六職吳氏移屬司馬謂其文皆守禦畜牧等事觀於役服不氏可見芬謂罪隸之役百官府蠻隸之役校人閩隸之役牧人貉隸之役服不此皆由司隸掌其政令亦若掌戮

之所司墨者使守門剗者使守關宮者使守內刑
者使主鬪髡者使守積皆爲司寇之屬無疑也况
所謂搏盜賊守野舍凡因執人之事因司寇詰姦
慝之意耶但罪蠻五隸不合列官蓋皆以罪而坐
之役者當如掌戮之列墨剗髡宮沒其官而存其
職以統歸於司隸則庶乎古作者之意矣又於布
憲職云五官俱不復設縣布之官此職僞當剔去
之案吳幼清以司隸六職入司馬實出臆說罪蠻
五隸只有人數本不列官舒氏訂正最確乃以布

憲一職爲僞而欲剔去之不知先王用心最重刑
獄故詔民獨詳王志長刪翼辨而正之是矣

禁殺戮攘獄者過訟者以告而誅之注鄭司農云攘
獄者距當獄者也過訟者遏止欲訟者也元謂攘
猶卻也卻獄者言不受也賈疏卻獄言不受者謂
人有罪過官以文書追攝不肯受者王志長刪翼
愚按卻獄卽今所云拒捕歟

禁暴氏凡奚隸聚而出入者則司牧之戮其犯禁者
注奚隸女奴男奴也王應電翼傳奚民間婦女服

役於后宮者隸奚隸之守王宮者故並言出入謂
出入於王宮也司牧糾察統治之不得非爲有犯
禁而戮之也舊以奚爲女奴女奴主幽閉安得復
有出入乎

野廬氏掌達國道路至於四畿王應電翼傳夏官有
司險合方氏主達天下之道路但治其大略而已
此官則主達畿內之道路蓋侯國皆有此職而王
畿爲之主也野廬氏之職修雖有迢遞遠行而常
如繇於堂階間矣國語單襄公使過陳道弗不可

行司里不授館客無寄寓而知陳之將亡野廬氏之職其可忽乎

蜡氏掌除𦍋注曲禮四足死者曰漬故書𦍋作脊鄭司農云脊讀爲殯謂死人骨也月令曰掩骼埋胔骨之尚有肉者及禽獸之骨皆是案集韻𦍋本作𦍋亦作𦍋殯或書作𦍋又殯亦作殯殯古皆通用殯禮記作漬古文作脊又假借字也

雍氏春令爲阱獲溝洫之利於民者秋令塞阱杜獲注阱穿地爲壑可以禦禽獸其或超踰則陷焉世

謂之陷阱獲柞鄂也堅地阱淺則柞鄂於其中秋
而杜塞阱獲刈之時爲其陷害人也賈疏柞鄂
者或以爲豎柞於中向上鄂鄂然所以載禽獸使
足不至地不得躍而出也案獲阱卽中庸之罔獲
陷阱也楊慎丹鉛總錄罔獲以罔爲獲而挂之陷
阱爲阱如井以陷阱獲以扁霜禽獸今之扣網也
陷阱以陷墜禽獸今之賺坑也

禁山之爲苑澤之沈者注爲其就禽獸魚鼈自然之
居而害之鄭司農云不得擅爲苑囿於山也澤之

沈者謂游魚及水蟲之屬案沈與苑對文爲義郭
緣生續述征記女水至安平城南伏流一十五里
然後更流注北烏常沈齊人謂湖爲沈澤之沈者
謂擁澤爲湖獨擅魚鼈之利也王志長刪翼引某
氏曰依山爲苑就澤爲沈則專利於亡肆害於物
故皆禁之戒暴殄也

序官萍氏注萍氏主水禁萍草無根而浮取名於其
不沈溺王安石新義神農之書言萍能勝酒其爲
物又不溺沈故掌國之水禁幾酒謹酒禁川游者

名官曰萍氏

萍氏幾酒謹酒注幾酒苛察沽買過多及非時者謹
酒使民節用酒也書酒誥曰無彝酒困學紀聞萍
氏幾酒猶妹土之誥也禹惡旨酒易未濟之終以
濡首爲戒曷嘗導民以飲而罔其利哉初權酒酤
書於漢武紀其流害萬世甚於魯之初稅畝王應
電翼傳萍氏掌水禁而兼酒者水所以載舟亦所
以覆舟酒所以爲人合歡而溺則生禍取其類也
司寤氏掌夜時注夜時謂夜晚早若今甲乙丙丁戊

顏氏家訓書證篇或問一夜何故五更更何所訓
答曰漢魏以來謂爲甲夜乙夜丙夜丁夜戊夜陸
倕新漏刻銘李善注衛宏漢舊儀曰晝夜漏起省
中用火中黃門持五夜甲夜乙夜丙夜丁夜戊夜
也

司烜氏王安石新義燿與烜皆火司燿掌出入火南
方之屬司烜掌明水火司寇所奉故列司燿於夏
而司烜在秋官也舒芬周禮定本吳氏以此條爲
祭祀之事非刑獄之官所宜與欲歸宗伯芬謂王

之大祭祀則五官具在皆有執事若謂刑官不足以昭格則書言典獄惟克天德自作元命配享在下是典獄用刑之極功可以作命配天而顧不可以與祭祀耶況五刑之用實惟天討故凡王之大事則六官皆與而不可以拘其職若小事則固有官成也亦孰得而紊之哉舜命咎繇作士則曰惟明克允是明乃司刑者之第一義也司烜之列明水火之率設官者於司寇盡有深意矣

凡邦之大事共墳燭庭燎注故書墳爲贊鄭司農云

蕢燭也元謂墳大也樹於門外曰大燭於門內
爲庭燎賈疏庭燎所作依慕容所爲以葦爲中心
以布纏之飲蜜灌之如今蠟燭案徐炫歲時雜記
除夕作蕢燭以麻粃濃油如庭燎然則蕢燭之制
唐季猶存先鄭依古文爲解其說亦未可廢也

條狼氏注杜子春云條當爲滌器之滌元謂滌除也
狼狼扈道上賈疏狼扈道上謂不獨之物在道猶
言狼藉也案夏小正正月寒日滌傳松卿注舊注
滌一作條韓鄧歲華紀麗立春滌風至是條滌古

今通川也穆希文蟬史狼起卧游戲多藉其草而
草皆穢亂故里語云狼藉又曰狼戾名物考案狼
之喻最多言其恣食則曰狼餐言其恣取則曰狼
貪言其威顧則曰狼顧言其亂走則曰狼竄言其
陸梁則曰狼戾言其專悞則曰狼很言其不恤則
曰狼戾言其不檢則曰狼藉言其乖謬則曰狼狼
條狼氏掌執鞭以趨辟王出入則八人夾道公則六
人侯伯則四人子男則二人賈疏序官條狼氏下
士九人今云天子八人或取胥役中兼充與翰案

此卽論語所謂執轡之士也

修閭氏掌比國中宿互櫟者與其國粥而比其追胥者而賞罰之注粥養也國所遊養謂羨卒也追逐寇也胥讀爲脩故書互爲巨鄭司農云當爲互宿謂宿衛也互謂行馬所以障互禁行人也案柎櫟之柎故書亦作柜當依先鄭作互爲是胥卽胥徒之胥無煩異讀王安石新義謂國粥爲粥物於國中者市官所不治故修閭氏比之王志長剛與斥之云粥物者何與於追胥乎宜從注

庶氏注庶讀如藥煮之煮驅除毒蠱之言王安石新
義先王以善政養天下既繁且庶故設官以除毒
蠱之害謂之庶氏也案介甫如經字訓釋較注義
爲長

郝敬完解冥庶二氏盡寇之情矣曖昧疑似姦宄之
狀冥氏銷其隱庶氏攻其姦

穴氏掌攻螭獸各以其物火之注螭獸熊羆之屬冬
藏者也將攻之必先燒其所食之物於穴外以誘
出之案注說燒其所食之物此義甚鑿陸佃埤雅

釋獸熊冬蟄不食饑則自舐其掌故其美在掌熊
蟄時並無食物將何所燒乎蓋謂以火薰之使出
穴也

楚氏掌攻猛鳥各以其物媒而犄之案潘安仁射雉
賦序餘暇習媒翳之事徐爰注媒者少養雉子至
長狎人能招引野雉因名曰媒翳者所隱以射者
也此卽以其物爲媒之義今俗捕鶉者呼爲誘子
亦其類也

柞氏掌攻草木及林麓注柞除木之名舒芬周禮定

本草字衍文案柞固是除木連文及草無不可者
未定卽爲衍文也

序官薤氏注薤或作夷鄭司農云掌殺草故春秋傳
曰如農夫之務去草芟夷蘊崇之元謂薤讀如鬚
小兒頭之鬚翦草也月令燒薤行水謂燒所芟草
乃水之案經本夷薤異文先鄭依左傳後鄭依月
令並有經據宜兩存之

薤氏掌殺草春始生而萌之注故書萌作薹杜子春
云當爲萌書亦或爲萌萌謂耕反其萌芽元謂萌

之者以鋹其所其生者案萌故書作薨古文假借
字

序官若族氏注鄭司農云若讀爲摘族讀爲爵族之
族謂巢也元謂若古字從石折聲案顧野王玉篇
若天歷切音惕石中火也據此義則必用含火之
石以毀其巢取陽之勝陰也

若族氏掌覆天鳥之巢注天鳥惡鳴之鳥若鷄鴈是
鄭鰭解義王政仁及飛鳥不毀卵不覆巢今乃設
官以摘去之何耶觀韓愈有射訓狐詩聖惠方言

有鳥夜飛小兒衣服遭之輒成疾狀如五疳是知
天鳥之害有如此者不可以不去也

以方書十日之號十有二辰之號十有二月之號十
有二歲之號二十有八皇之號縣其巢上則去之
注天鳥見此五者而去其詳未聞劉彝中義縣諸
其巢之上則衆神臨之正氣之所萃也是以天邪
之物無所自存邱富國曰天鳥避此五者理亦有
之蝠忌庚申燕避戊己虎豹以衝破鵲作巢避太
歲以此觀之周公不虛言也葉時禮經會元服不

氏廢則冬多麋矣壺涿氏廢則秋有蜚矣砮族氏
廢則鸛鵒來巢矣射鳥氏廢則爰居有祀矣

翦氏掌除蠹物以攻崇攻之以莽草熏之鄭鐸解義
謂其有神則以攻崇攻之謂其有毒則以莽草熏
之案李時珍本草綱目莽草釋名蒿草芒草鼠莽
宏景曰莽本作蒿字俗訛呼爾時珍曰此物有毒
食之令人幽罔故名山人以毒鼠謂之鼠莽然則
豳風七月篇穹窒熏鼠其用此草歟

赤友氏注赤友猶言挾拔也主除蟲豸自埋者賈疏

揀拔除去之也

𧈧𧈧攻之注故書𧈧爲晨鄭司農云當亦作𧈧書
 亦或爲晨案晨乃𧈧字之異文許慎說文解字𧈧
 𧈧也揚雄曰𧈧𧈧蟲名杜林倉頡訓詁假爲朝旦
 之朝意亦類此

序官蝻氏注鄭司農云蝻讀爲蜮蜮蝦蟆也月令曰
 螻蝻鳴故曰掌去鼃鼃蝦蟆屬書或爲掌去
 蝦蟆元謂蝻今御食蛙也字從虫國聲也蜮乃短
 狐又蝻氏掌去鼃鼃注齊魯之間謂鼃爲蝻鼃耿

鼃也。蝮與耿鼃尤怒鳴爲聒人耳。故去之。段氏王
裁周禮漢讀考。鄭司農謂鼃。蝮。蝦蟆。屬。至許叔重
說文直云鼃。蝦蟆。也是鼃與蝦蟆不別甚矣。鄭氏
則顯別鼃與蝦蟆爲二類。漢元鼎五年。鼃與蝦蟆
闕二物。可知此勝於許。鄭者一也。司農說文皆以
鼃。鼃爲一物。鄭君則知鼃與耿鼃爲二。此勝於鄭
許者二也。司農云。蝮讀爲域。域訓蝦蟆。引月令。螻
蟻鳴。司農所據禮記。蓋作螻蟻。說文則云。域。短狐
也。蝮同域。鄭君則曰。蝮非蝦蟆。亦非短狐。域訓短

狐亦蝸名字此勝於鄭許者三也

壺涿氏掌除水蟲以炮土之鼓毆之以焚石投之若
欲去其神則以牡棹午貫象齒而沈之則其神死
淵爲陵注水蟲狐蜮之屬故書炮作泡鄭元謂炮
土之鼓瓦鼓也焚石投之使驚去神謂水神龍罔
象故書棹爲梓午爲五杜子春云梓當爲棹棹讀
爲枯枯榆木名五貫當爲午貫王昭禹詳解聖人
所以變化驅除之術如此夫孰得而測之且夫琥
珀拾芥磁石引鍼戎鹽繫卵獺膽分杯坏漆以蟹

浣錦以魚散血以藕皮殷金以羊角皆出於自然之理也

庭氏掌射國中之天鳥若不見其鳥獸則以救日之弓與救月之矢射之若神也則以太陰之弓與枉矢射之注鄭司農云救日之弓救月之矢謂日月食時所作弓矢元謂日月之食陰陽相勝之變也於日食則射太陰月食則射太陽與神謂非鳥獸之聲若或叫于太廟謠謠出出者王昭禹詳解弓矢常用以救日月則其精氣足以勝妖故以此射

之按司弓矢職云枉矢利火射薛氏曰枉矢狀如
流星飛行有光蓋取以陽勝陰之義也案注謂於
日食則射太陰月食則射太陽於義未安經言射
天鳥以救日之弓與救月之矢不言射日月也
銜枚氏掌司嚙郝敬完解秋政森嚴至於庭氏則鬼
神無夜號者至於銜枚氏則朝市無誼譁者太平
之象覩矣

序官伊耆氏注伊耆古王者號始爲蜡以息老物此
主王者之齒杖後王識伊耆氏之舊德而以名官

與今姓有伊耆氏

伊耆氏掌國之大祭祀共其杖咸注咸讀爲函老臣
杖於朝事鬼神尙敬去之有司以此函藏之既事
乃授之案古無以咸爲函者形聲相去亦遠攷禮
記喪大記凡封大夫士以咸注咸讀爲緘今齊人
謂棺束爲緘繩咸或爲械釋文咸一本作緘咸緘
二字古通用此經杖咸亦讀爲緘謂緘藏之似與
形聲爲近

朱子語錄周禮最是大行人等官屬之司寇難曉蓋

儀禮覲禮諸侯行禮既畢則降而肉袒請刑於廟
門之吏王曰伯父無事歸寧乃邦然後再拜稽首
出自屏此所謂懷諸侯則天下畏之是也所以屬
之司寇如此等處皆是合著如此初非聖人之私
意也

大行人春朝諸侯而圖天下之事秋覲以比邦國之
功夏宗以陳天下之謨冬遇以協諸侯之慮注六
服以其四時分來更迭如此而徧賈疏侯服年年
朝春東方來夏南方來秋西方來冬北方來甸服

二歲一見男服三歲一見當朝之歲亦春東夏南
秋西冬北采衛要服皆然禮經會元書言巢伯來
朝是南方來朝也豈必東方諸侯春朝而言圖事
詩稱韓侯入覲是北方入覲也豈必西方諸侯秋
覲而言比功乎恭讀

周官義疏案朝覲宗遇四方之諸侯皆有之隨其至
之早晚而與之爲禮故有四時之異名也如疏言
則東方者有朝而無覲宗遇西方者有覲而無朝
宗遇南方者惟有宗北方者惟有遇旣偏苦而不

平亦窒礙而不可行矣

禮記集說卷之四

鄭注說大行人朝位云朝位謂大門外賓下車及王
車出迎所立處也王始立大門內交擯三辭乃乘
車而迎之齊僕爲之節上公立當軹侯伯立當前
疾子男立當衡王立當軫與王安石新義上公朝
位賓主之間九十步立當車軹擯者五人侯伯七
十步立當前疾擯者四人子男五十步主當衡擯
者三人則尊者舒而縹卑者感而略故也陳傅良
說賓主之間九十步立王行四十五步以迎賓賓

行四十五步以朝王易收總義同此說案注言上公立當軹王立當軫是立處相去九十步也擯者傳辭後公當趨進王前前乃就之賓主各四十五步平等抗禮似非所宜也

賈疏覲禮天子不下堂而見諸侯此春夏受贄在朝亦無迎法至朝後行三享在廟天子親迎並巾上服乘金路之等易收總義不下堂而見諸侯特漢儒之說耳上公朝位後鄒止曰賓下車及王車出迎所立處若賈氏則直以爲在廟乃有此迎賓之

法禮旣明言朝位則是外朝之位有此迎賓之法
奈何強爲之說乎案孔穎達禮記正義崔云諸侯
春夏來朝各乘其命車至皐門外陳介天子車時
在大門內傳辭旣訖乘車出大門下車若升朝之
時王但迎公自諸侯以下隨之而入更不別迎也
天子還服朝服立於路門之外諸侯更朝服執贄
以入應門而行禮若熊氏之義則朝無迎法惟享
有迎諸侯之禮賈疏謂朝無迎法蓋本熊安生禮
記疏說也此經有將幣之文專指享禮參以齊僕

職所言朝覲宗過饗食皆乘金路其法儀各以其
等爲車送迎之節豈迎入而行饗乎然則廟之
享朝之饗皆有迎賓之禮矣至夷王下堂而見諸
侯謂常朝非行享及饗食之時懾於臣下不覺失
禮故記以爲譏也

廟中將幣三享王禮再祿而酢注禮者使宗伯攝酌
圭瓚而祿王旣拜送爵又攝酌璋瓚而祿后又拜
送爵是謂再祿鄭錫解義小宰職曰凡賓客贊祿
謂贊主也小宗伯祿將亦贊王也蓋宗伯攝酌何

用小宰小宗伯贊之乎內宰職曰凡賓客之裸獻
瑤爵皆贊謂贊后也若王后不與則外宗贊宗伯
而內宰亦必贊矣康成蓋因大宗伯職言大賓客
則攝而載祿遂失之不知大宗伯乃后不與而攝
之以拜送耳宗伯攝后則內宰亦贊宗伯矣

凡大國之孤執皮幣以繼小國之君出入三積不問
宣勞朝位當車前不交擯廟中無相以酒禮之其
他皆祗小國之君賈疏引趙商問其他初祗小國
之君以五爲節下云諸侯之卿各下其君二等是

公使卿亦七侯伯亦五子男三不審大國孤五而卿七何答曰卿奉君命七介孤尊更自特見故五介此有聘禮可參又問出入三積此卽與小國同宜應視小國之君何須特云三積與例似錯答曰三積者卿亦然不獨孤也故不在祗小國之中然則豈勞者亦是卿亦然故須見之

林之奇尙書全解周官言六年五服一朝大行人言侯服歲一見至要服而後六年一朝與此經不合唐孔氏雖引歲聘以志業問朝以講禮再朝而會

以示威再會而盟以顯昭明爲與此經相當然左氏之言是三年一朝六年一會十二年一盟計十二年之中諸侯之朝不止於二則此十二年止於二朝然後王巡狩亦不得爲相當唐孔氏又以大行人所云見者皆見貢物或可因貢而見何必皆是君自朝乎按周官朝覲宗遇會同皆其君自行故皆言見至於問與視則其臣故曰時聘殷頌而已不言見也以見爲遣使亦非周官之本意然此篇所載六卿與周禮同而惟六年五服一朝句與

周禮異翰案尙書周官晉代晚出之篇不無舛錯
當以周禮爲準

大行人邦畿方千里其外方五百里謂之侯服歲壹
見其貢祀物又其外方五百里謂之甸服三歲壹
見其貢嬪物又其外方五百里謂之男服三歲壹
見其貢器物又其外方五百里謂之采服四歲壹
見其貢服物又其外方五百里謂之衛服五歲壹
見其貢材物又其外方五百里謂之要服六歲壹
見其貢貨物王與之訂義唐氏曰楚之於周非侯

服而包茅不入齊得以貢之則祀貢不止於侯服
行人之文蓋亦互見耳非以此爲限也王志長刪
翼引雜說云禹貢九州貢各以其所有東西南北
異處產物不同而大行人言土貢四面如一先儒
不能明也而信之是不知六服諸侯貢物凡有九
貢大行人始整齊言之不復言某國貢某物也王
應電翼傳此亦約六服所貢之大分而言職方氏
制其貢各以其所有六服每歲皆有貢則小行人
所令春入貢也翰案大行人六服所貢視大宰九

貢無幣貢旂貢物貢此三者固在職方氏制貢之內亦或如禹貢錫命而後貢之與此歲皆有貢者不同包匭菁茅與橘柚並爲物貢似未可以祀貢目之也

九州之外謂之蕃國世壹見各以其所貴寶爲摯注九服之外夷服鎮服蕃服也曲禮曰其在東夷北狄西戎南蠻雖大曰子又云各以其所貴寶爲摯則蕃國之君無執玉瑞者案五瑞以封五等之君蕃國既稱子則禮當執穀璧矣以其所貴寶爲摯

自指率之加璧及其土地之異產也

凡諸侯之邦交歲相問也殷相聘也世相朝也程子
全書先儒有王臣無外交之說非也若天下有道
諸侯順軌豈有內外之限其相交好乃常禮也然
委官守而遠朝無是道也周禮所謂世相朝謂鄰
國耳

小行人合六幣圭以馬璋以皮璧以帛琮以錦琥以
繡璜以黼此六物者以和諸侯之好故薛圖說合
者兩兩相配有配合之義也圭東方也以象陽之

生物馬陽類也乾之所爲故合以馬璋章也文明
之方所用皮有文焉故合璋以皮璧象天天事質
故合璧以帛琮象地地事文故合琮以錦琥爲虎
形西方也萬寶所成繡則五采之全故合琥以繡
半璧曰璜北方所用也陰陽之辨莫斷於此故合
璜以黼以白與黑謂之黼故也

若國札喪則令賻補之注故書賻作傳鄭司農讀爲
賻賻補之謂賻喪家補助其不足也又若國師役
則令槁贈之注故書槁爲槩鄭司農云槩當作槁

謂犒師也案賙固宜於札喪犒固宜於師役然古文經字實作傳作稟皆當如字解之傳若大宰職之傳別令傳補者謂就附近之地發倉粟以補助之也稟積也春秋左傳哀三年於是乎去表之稟杜預注去其稟積令稟贈者謂出委積以贈禮哀之也

司儀將合諸侯則令爲壇三成宮旁一門注天子春帥諸侯拜日於東郊則爲壇於國東夏禮日於南郊則爲壇於國南秋禮山川邱陵於西郊則爲壇

於國西冬禮月四饋於北郊則爲壇於國北既拜
禮而還加方明於壇上而祀焉所以敬尊尊也又
詔王儀南鄉見諸侯士揖庶姓時揖異姓天揖同
姓注諸公中階之前北面東上諸侯東階之東西
而北上諸伯西階之西東面北上諸子門東北面
東上諸男門西北面東上王揖之者定其位也又
及其擯之各以其禮公於上等侯伯於中等子男
於下等其將幣亦如之其禮亦如之注擯之各以
其禮者謂擯公者五人侯伯四人子男三人也恭

讀

周禮義疏案覲禮所云禮日於南門外禮月與四瀆
於北門外禮山川邱陵於西門外者蓋繼拜日祀
方明之後相屬而爲之非四時之異也門卽謂壇
宮之四門非國門也詳見儀禮壇三成每成高一
尺則無階也壇宮雖有四門諸侯皆從南門入其
位則自西而東皆北面與明堂位朝事義所言諸
侯之位異諸侯旣就位王乃於壇上揖之揖之謂
升之也擯之謂上擯迎之使升也是時上擯盡立

於壇之上等稍東而西面以擯升降而傳辭承擯
以下立於門東北面之位以羣侯立於三等之壇
爲地無幾不能容多人也一朝三享所謂四傳擯
也禮亦如之又於四擯之外禮之蓋一祿而已無
酢亦不授几地窄人多諸禮從簡可知

皆旅擯再勞注鄭司農云旅讀旅於泰山之旅謂九
人傳辭相授於上下竟問實從末上行介還受上
傳之元謂旅讀爲鴻臚之臚臚陳之也賈疏先鄭
讀旅爲旅泰山之旅謂九人傳辭相授後鄭不從

者下文云主君郊勞交擯三辭明與此別旅直陳
擯介不傳辭交則一往一來傳辭也

王應麟玉海還觀九儀布在六典馭貴富以爵祿詔
於大宰聽祿位以禮命敘於小宰以儀辨等見於
大司徒正儀辨位見於大司馬至其命秩則掌於
春官意者出爵賜命藹然如春所以昭示上仁其
儀章則詳於秋官意者序爵秩禮肅然如秋所以
森嚴典憲擯相謹於司儀禮籍具於小行人掌訝
辨其邦國之等掌交諭其九禮之親康成傳經皆

以九儀釋之然儀之別雖至於九儀之總不過乎五又約而言之則三而已故典命之敘諸侯曰五儀諸臣曰五命而軻書王制之序爵皆五等也武成之列爵惟五於是可攷矣司服有公之服侯伯之服子男之服掌客有公之禮侯伯之禮子男之禮行人敘諸侯則曰如諸公男則曰如諸子而司儀贊見亦爲壇三成序揖皆三等也武成之分士惟三於是可驗矣王朝內臣外貺侯邦之秩上公之孤旁貺小國之君由卿八命下而至士至於一

命則邦伯所同由卿再命下而至士微或不命則
子男所獨大概不越乎三耳儀以九爲數故詳而
難案儀以三爲等故簡而易明

行夫居于其國則寧行人之勞辱事焉使則介之注
使謂大小行人也故書曰夷使鄭司農云夷使使
於四夷則行夫主爲之介元謂夷發聲釋文焉劉
音夷廖文英正字通周禮焉字連上句讀居于其
國則掌行人之勞辱事焉使則介之焉語助辭也
當如字讀讀作夷非案正字通說於文義極順但

故書作夷使先鄭直作四夷解後鄭意以使不專於四夷改爲發聲總以古文夷字不可沒滅也但古無以夷爲發聲者意或如曲禮在醜夷不爭之夷言與行人等使也

環人鄭錫解義周官有二環人夏官之環人掌致師此官環人掌環遶賓客而爲之衛事雖不同皆有取於循環之義故皆名曰環人王應電翼傳地官以懷賓客爲職故遺人之官所以養之之道備秋官以詰姦慝爲職故野廬之官所以衛之之法嚴

然無統一之者大行人主賓客於四門故特設環
人之官兼此二事

象胥凡軍旅會同受國客幣而賓禮之注謂諸侯以
王有軍旅之事使臣奉幣來問劉彝中義國客謂
入賓而遇大喪軍旅會同者皆指蕃國案象胥專
主蕃國劉說爲是象胥一職猶今之通事也

掌客王合諸侯而饗禮則具十有一牢庶具百物備
諸侯長十有再獻注饗諸侯而用王禮之數者以
公侯伯子男盡在是兼饗之莫敵用也諸侯長九

命作伯者也賈疏莫敵用者謂兼饗諸侯無二相敵故云莫敵用也若曲禮云大饗不問卜鄭云莫敵卜也恭讀

欽定周官義疏案敵當作適此長字如燕禮大夫長升受旅之長謂尊先卑後而次第獻之也

三問皆脩羣介行人宰史皆有牢注脩脯也上公三問皆脩下云羣介行人宰史皆有牢君用脩而臣有牢非禮也疑有脫誤耳王氏詳說上公致積則有殽羣問禮隨而至故加以脩耳羣介行人宰史

皆有牢不爲過也侯伯子男則不言以上公爵命
獨隆其禮亦獨隆也

牲三十有六皆陳注牲當爲腥聲之誤也腥謂鼎腥
也於侯伯之腥二十有七其故腥字也案說文解
字胜犬膏臭也从肉生意兼聲一曰不熟也徐鉉
注引禮記飮胜而苴熟禮內則秋宜饋膳膳膏腥
釋文腥雞膏也說文作胜蓋文以相似而致誤

牽四牢米百有二十筥醯醢百有二十罍車皆陳車
米眡生牢牢十車車乘有五簋車禾眡死牢牢十

車車三秬芻薪倍禾背陳注米橫陳於中庭十爲
列每筥半斛又云皆陳於門內者於公門內陳之
也言車者衍文耳車米載米之車也聘禮曰十斗
曰斛十六斗曰簋十簋曰秉每車秉有五簋則二
十四斛也禾藁實并刈者也聘禮曰四秉曰筥十
筥曰稷十稷曰秬每車三秬則三十稷也稷猶束
也米禾之秉筥字同數異禾之秉手把耳筥讀爲
棟枳之枳謂一枳也王應電翼傳筥米陳於中庭
以備貴者之食若車米則陳於門外賤者之食也

聘禮彙十六斛四秉曰筥則米數太多或誤文不可考矣案經言車皆陳者謂牢米等以車載而至皆陳於庭車字不爲衍文待賓之禮宜致其豐牢米十車未爲過也

掌訝易敝總義主聽斷四方之獄訟故曰訝士專送迎四方之賓客故曰掌訝

王志長剛翼觀掌交職使咸知王之好惡辟行之而知王之好惡不可以不慎也王之好惡在深宮曲房聾笑寢興之際而諸候之貞褻生民之休戚風

俗之汚隆全於此如好聲色則聲色進好土木則
土木進好神仙則神仙進好財賄則財賄進噫好
惡亦可危矣至後世變爲名法之說則又隱其好
惡與天下相蒙於不測而聞聲之習日亢幾鬼而
不人共辰之誼日虛匿心而徒貌上下相遁而三
代之治終不可追矣

章如愚羣書考索天子之士視諸侯之卿故朝大夫
雖以士爲之而名其官曰大夫

王應龍翼傳春官有都宗人夏官有都司馬秋官有

方士朝大夫都則都士每都設官凡六家亦如之
蓋王畿千里之地公邑之外爲家邑家邑之外爲
小都小都之外爲大都天子不能自治之也故封
其子弟與夫公卿大夫錯居而統領之蓋爲王治
之非若諸侯之世國與其地也夫挈百里之人民
土地以馭之使操縱與奪之權盡歸之而不由己
萬一不得其人寧免倒持大阿之禍耶此都宗人
等官之所由設也祭祀名器禮之大經也於是有
都宗人家宗人庶子兵馬國之大柄也於是有都

司馬家司馬法則者馭官之大權也於是有都則
司刑者民命之所關也於是有方士治中者攷治
之要也於是有都士家士至於王朝有令於都家
都家有治於王國不可無統率也於是有朝大夫
此六官者皆列王朝之爵而任都家之事其治法
一聽於王官非若小事而其君得以擅爲此政教
所以齊一其廢置皆由於家宰非若小吏而其君
長得以專易此血脈所以流通也